



Prome Minister a haci entrega di e relato anual 2024 na biblioteca nacional

DIALUNA atardi Prome Minister Evelyn Wever-Croes tabata na Biblioteca Nacional p'asina haci entrega di e relato anual 2024 di Ministerio di Asuntonan General y Infraestructura. Esaki t'e relato anual cu Prome Minister ta traha tur aña hunto cu tur e hefenan di e departamentonan bou di su ministerio. E relato aki ta consisti di tur e logronan di e gobierno, tur e retonan cu a enfrenta, tur loke gobierno no a logra y di ki manera lo bay traha na logra esakinan.

Prome Minister a indica cu desde e prome aña completo den gobernacion na 2018, el a traha e prome relato, y despues cada aña a sigui cun'e y a publik'e p'asina comunidad en general por tin acceso na dj'e. Tambe e mandatario ta entrega, tur aña, un copia di e relato anual na Biblioteca Nacional



cu ta pon'e den e departamento di Arubianita p'asina e bira parti di nos historia. Cu esaki tur e trabounan cu a

wordo haci hunto no ta wordo lubida paso e ta graba den tur locual cu t'e archivonan importante na Biblioteca Nacional.

“Mi ta considera esaki un clausura di e bunita temporada cu mi tabata Minister President pa 7 aña y mei. Mi ta sumamente orguyoso cu di cada un di e 7 añanan aki tin un relato na Biblioteca Nacional cu futuro generacionnan por bay lesa y asina por educa nan mes riba tur e trabounan valioso haci pa Gabinete Wever-Croes I y II. Den e relato nan lo siña kico gobierno a haci durante e pandemia mas grandi na mundo Covid-19, tur e retonan/ negociacionnan cu Hulanda pa cu esaki, e crisis cu Venezuela, y e crisis ora Merca a cambia gobierno. Pami e relatonan aki ta mi legado p'e pueblo di Aruba” Prome Minister a expresa.

Prome Minister a ricibi Miss Teen Universe Aruba

DIALUNA atardi Prome Minister Evelyn Wever-Croes a ricibi e grato bishita di señorita Guizza Maria Steenvoorde cu lo ta representando Aruba na Teen Universe 2025 proximamente na Punta Cana, Republica Dominicana.

E mainta aki Guizza a bin bishita Prome Minister pa comparti con e ta preparando pa representa Aruba dignamente. Guizza ta conoci como un hoben dinamico y cu experiencia den e mundo di pasarela y certamen. Prome Minister a indica cu p'e semper



ta un honor grandi pa topa y combersa cu nos hobennan prome cu nan bay representa Aruba den exterior. Semper e ta haci tur lo posibel pa yena nan cu

curashi y animo cordando nan semper cu Aruba henter ta para nan tras y tin nan den nan curason, den pensamiento y den oracion.

“Guizza ta otro embahadora digno di Aruba. E lo hiba e calor, beyesa y e inteligencia di e muhe Arubiano na e certamen internacional. Guizza, bo a prepara bon pa esaki y nos sa cu bo lo haci nos mas orguyoso ainda. Den nomber di Gobierno y henter e pueblo di Aruba, mi ta desea bo hopi exito”, Prome Minister a expresa.